

**Di Leta Weh Paal Rait  
tu di Cherch da  
KOLOASEH  
Weh dis leta di taak bowt**

Di apasl Paal rait dis leta tu di cherch da Koloaseh, weh da wahn tong weh deh eena Aysha Maina, weh da di konchri weh dehn kaal Terki tudeh. Dehn mi tink dat Paal mi eena prizn wen ih rait dis leta. Da Ipafras weh staat di cherch da Koloaseh, bot di cherch mi deh eena wahn ayrya weh Paal mi rispansabl fa. Soh ih doz sen owt werkaz fahn Efisos weh da-mi di kyapital a di Roaman Aysha. Paal mi laan seh dat faals teechaz mi deh eena di cherch da Koloaseh, ahn dehn mek dimanz pahndi peepl seh dat if dehn waahn noa Gaad ahn ga di ful salvayshan, den dehn wahn haftu wership sertn spirichwal roolz ahn ataritiz. Lang wid dat, di faals teecha dehn seh tu dat yu haftu goh chroo speshal rilijos serimoni laik serkomsizhan, ahn dat yu fi kip di schrik roolz weh dehn ga bowt food ahn ada tingz.

Paal rait fi shoa seh dat dehndeh teechin rang, ahn soh ih gi dehn di Kristyan teechin weh chroo. Di moas impoatant ting weh Paal tel dehn da-mi dat Jeezas Kraiss da di Wan weh gi ful salvayshan ahn dat aal dehn ada tingz wahn leed dehn weh fahn Jeezas Kraiss. Ih tel dehn seh dat Gaad mek di werl chroo Kraiss, ahn da chroo hihn, Gaad di bring bak di werl tu ihself. Di oanli hoap a salvayshan fi di werl da fi bee wan wid Kraiss. Den Paal eksplayn weh dis meen fi di bileeva dehn.

Tichikos, weh da di wan weh kehr dis leta da Koloaseh fi Paal, mi-di chravl wid Onesimos. Memba Onesimos da-mi di slayv weh Paal rait bowt eena *Faileeman*.

**How dis leta set op**

Inchrodokshan 1:1-8

Di kaina werk weh Kraiss du 1:9-2:19

Di nyoo laif weh wi ga eena Kraiss 2:20-4:6

Paal laas werd dehn eena dis leta 4:7-18

<sup>1</sup> Dis leta da fahn mee, Paal, weh da wahn apasl a Kraiss Jeezas, kaa dat da weh Gaad waahn. Ah di rait dis leta lang wid wi brada Timoti.

<sup>2</sup> Wi di rait tu Gaad peepl dehn eena Koloaseh, weh da wi bradaz ahn sistaz weh faytful tu Kraiss.

Wi di pray seh dat Gaad wi Faada gi unu grays ahn pees eena unu haat.

*Wi tel Gaad tanks  
wen wi pray fi unu*

<sup>3</sup> Aal di taim wen wi pray fi unu, wi tel Gaad, di Faada a wi Laad Jeezas Kraiss, tanks. <sup>4</sup> Wi tank ahn bikaaz wi yehr how unu chros eena Kraiss Jeezas ahn how unu lov aala Gaad peepl dehn. <sup>5</sup> Wen di chroo mesij mi fos kohn tu unu, unu mi yehr bowt di hoap weh ih gi. Soh unu fayt ahn lov res pahn weh unu di hoap fa; ahn aal weh yu hoap fa dehdeh sayf fi unu da hevn.

<sup>6</sup> Di Gud Nyooz bowt Jeezas Kraiss kip aan di bring blesinz ahn ih di spred aal oava di werl. Da di sayhn way ih spred monks unu fahn di day unu fos yehr bowt di grays\* a Gaad ahn geh fi andastan di chroot bowt it. <sup>7</sup> Unu mi laan bowt di grays a Gaad fahn wi gud fren, Ipafras, weh da wahn servant a Gaad tu. Hihn werk tageda wid wee ahn ih da wahn faytful werka. Hihn di help unu eena fi wee plays.† <sup>8</sup> Da hihn mi tel wi bowt di lov fi adaz weh di Hoali Spirit gi yu.

---

\* **1:6** grays: Gaad lov ahn kainis weh wi noh dizerv. † **1:7** Sohn oalda kapi a di Greek seh help wee eena fi unu plays.

<sup>9</sup> Dat da wai wi neva stap pray fi unu fahn di fos day wi mi yehr bowt unu. Az a mata a fak, wi aalwayz pray seh dat Gaad wahn shoa yu evriting ih waahn yu du, ahn dat yu wahn ga aal di wizdom ahn andastandin weh di Spirit gi. <sup>10</sup> Den yu wahn ku liv eena wahn way weh aana di Laad ahn yu wahn ku du aala dehn ting weh wahn pleez ahn. Yu wahn waahn du dehn ting weh gud ahn kain tu ada peepl. Eena dis way yu wahn groa fi noa Gaad beta ahn beta.

<sup>11</sup> Wi di pray dat Gaad, wid aala ih maiti powa, wahn mek unu geh schrang soh dat unu wahn ku bayr evriting wid lata payshens, den yu wahn ga wahn hapi haat. <sup>12</sup> Unu fi tel wi Faada Gaad tanks, bikaaz hihn mek wi fi bee peepl weh fit fi geh wi paat eena weh ih pramis fi gi fi hihn peepl eena ih kingdom a lait. <sup>13</sup> Kaa Gaad don pul wi fahn owta wi sinful way weh mi ga powa oava wi ahn weh mek wi liv eena daaknis. Ahn Gaad don bring wi sayf fi liv eena ih Son kingdom, ih Son weh ih lov. <sup>14</sup> Da hihn set wi free ahn fagiv wi sin dehn.

*Krais ahn di werk weh ih du*

<sup>15</sup> Wi kyaahn si Gaad bot wi kud si Jeezas weh da egzakli laik hihn. Eevn bifo Gaad mi mek eniting ataal, Krais mi deh. Ahn hihn beta ahn grayta dan evriting weh Gaad mek. <sup>16</sup> Da chroo hihn, Gaad mek evriting weh deh eena hevn ahn weh deh pahn ert; hihn mek di ting dehn weh yu ku si ahn weh yu kyaahn si. Ih mek aal dehn king ahn roola dehn, ahn dehn wan weh ga atariti ahn powa eena di spirichwal werl. Da Gaad mek evriting, ahn ih mek evriting fi aana Krais. <sup>17</sup> Gaad Son mi deh bifo evriting ahn da hihn hoal evriting tugeda.

<sup>18</sup> Krais da di hed a di badi, weh da di cherch. Hihn mi deh bifo eniting mi mek, ahn ih da-mi di fos wan weh Gaad rayz op bak fahn di ded, soh dat ih wahn ga fos

plays oava aal. <sup>19</sup> Da Gaad ihself disaid seh dat di hoal a hihn wahn liv eensaida ih Son, ahn Gaad mi pleez wid dat. <sup>20</sup> Ahn chroo ih Son, Gaad bring bak aal weh eena dis werl ahn aal weh eena hevn bak tu ihself. Gaad mek pees wid aal chroo Kraiss wen Kraiss shed ih blod ahn ded pahn di kraas.

<sup>21</sup> Bifoa unu bileev eena Kraiss, unu yoostu bee faar fahn Gaad. Unu yoostu bee ih enimi dehn bikaaz a di sinful ting dehn weh unu mi tink ahn du. <sup>22</sup> Bot now Kraiss don kom eena wahn hyooman badi ahn ih don ded pahn di kraas. Bikaaz a dat, Gaad bring unu bak tu ihself, soh dat wen unu stan op fronta ahn, unu wahn bee hoali. Unu noh wahn gilty a du notn rang, ahn nobadi wahn kyaahn fain no faalt wid unu. <sup>23</sup> Bot unu haftu kip aan di bileev ahn stay schrang eena unu fayt ahn yu noh fi mek nobadi mek yu geh shayki eena di hoap weh yu mi geh wen yu mi fos yehr di Gud Nyooz. Dis Gud Nyooz mi preech tu evribadi eena di werl, ahn mee, Paal, di werk fi preech da Gud Nyooz.

### *Paal werk fi di cherch*

<sup>24</sup> Soh Ah oanli glad wen Ah ku sofa fi unu eena mi badi, bikaaz den Ah di finish aaf weh lef a di sofarin weh Kraiss mi haftu gaahn chroo fi di cherch weh da ih badi. <sup>25</sup> Gaad pik mee fi serv di cherch ahn soh ih sen mi fi goh preech fi hihn hoal mesij tu unu. <sup>26</sup> Dis mesij mi kip seekrit fi yaaz pahn tap a yaaz, ahn fi jenarayshanz fahn way bak, bot now Gaad shoa it tu ih peepl. <sup>27</sup> Gaad du dis bikaaz ih mi waahn unu peepl weh da noh Joo fi andastan dis wandaful ahn grayt ahn rich seekrit. Ahn dis seekrit da dat Kraiss liv eena yu. Dat giv yu di hoap ahn kanfidens dat yu wahn shayr eena Gaad gloari!

<sup>28</sup> Soh wi preech bowt Kraiss tu evribadi. Wi yooz aala di wizdom weh Gaad gi wi fi waan ahn teeche dehn soh dat wi

ku bring evribadi fronta Gaad az falowaz a Kraiss weh don groa op eena how dehn tink kaa dehn da wan wid Kraiss. <sup>29</sup> Dat da wai Ah werk soh haad an Ah haftu pen pahn di maiti powa a Kraiss weh di werk eena mee.

## 2

<sup>1</sup> Mek Ah tel unu how haad Ah haftu werk fi yoo ahn di peopl weh deh da Layodiseeya, ahn fi aala dehn ada wan dehn weh neva meet mi yet fays tu fays. <sup>2</sup> Ah di du dis fi inkorij dehn soh dat dehn wahn werk tugada wid lov. Den dehn wahn geh bles wid ful andastandin fi noa Gaad seekrit plan, ahn dat da bowt Kraiss ihself. <sup>3</sup> Kraiss ga aal di chreja a di wizdom ahn nalij a Gaad haid weh eena hihn.

<sup>4</sup> Soh Ah di tel yu dis soh dat nobadi kyaahn fool yu wid no fansi taak ahn aagyument eevn wen ih oanli song gud. <sup>5</sup> Bikaaz eevn doa Ah noh deh wid unu rait now, mi spirit dehdeh wid unu, an Ah glad fi noa seh dat unu di liv di way unu shuda liv ahn dat unu fayt eena Jeezas stil schrang.

### *Kraiss gi unu reel laif*

<sup>6</sup> Soh now, jos laik how unu mi aksep Kraiss Jeezas az unu Laad, wel da sayhn way unu fi kip aan di liv laik peopl weh da wan wid hihn. <sup>7</sup> Soh den yu fi mek yu root dehn goh deep dong eena Kraiss, soh hihn fi bee di fongdayshan fi yu laif. Den yu wahn groa schranga eena yu fayt ahn schranga eena di chroot weh dehn mi teech yu. Den yu laif wahn ful op a tanks fi aal weh ih du fi yu.

<sup>8</sup> Noh mek nobadi fool yu wid dehn aagyument weh noh mek no sens. Dehn mait song waiz, bot dehn da faals teechin weh han dong fahn hyooman been, ahn fahn di spirit dehn weh rool dis werl. Dehn noh kohn fahn Kraiss. <sup>9</sup> Kaa eena Kraiss kays, aala Gaad naycha liv eena ih hyooman badi. <sup>10</sup> Ahn Gaad gi unu di chroo laif wen unu

kohn fi bee wan wid Kraiss. Hihn da Laad oava evri roola ahn atariti eena di yoonivers.

<sup>11</sup> Wen unu kohn fi bee wan wid Kraiss, unu don geh serkomsaiz\* tu. Ahn dat da neva mi di serkomsizhan weh peepl du. Unu geh serkomsaiz wid di serkomsizhan weh Kraiss du. Soh dat da weh geh rid a unu oal wikid self soh ih noh ga no powa oava unu nohmoh. <sup>12</sup> Kaa wen dehn mi baptaiz yu, dehn beri yu wid Kraiss, ahn yu geh rayz bak op wid hihn tu wahn nyoo laif chroo yu fayt eena di powa a Gaad, weh rayz op Kraiss fahn di ded. <sup>13</sup> Unu yoostu bee ded bikaaz unu di sin, ahn unu stil mi deh anda di powa a unu sinful self. Bot now Gaad gi unu chroo laif wid Kraiss; ih don fagiv aala wi sin. <sup>14</sup> Gaad don waip owt aala di chaaj dehn weh mi deh gens wi fi sayka gaahn gens Moaziz Laa. Ih tek dehn ahn dischrai dehn wen ih nayl dehn tu di kraas. <sup>15</sup> Da dehsoh Gaad tek weh di powa a di eevl roolaz ahn atariti dehn eena di spirichwal werl. Ahn ih mek wahn oapm shoa a dehn wen ih leed dehn prizna eena ih vikchri parayd.

<sup>16</sup> Soh den, yu noh fi mek nobadi joj yu bowt weh yu shuda eet er jrink. Dehn noh fi tel unu weh unu shuda du pahn dehn speshal wershship day evri yaa er di taim evri mont wen peepl fi kip op di nyoo moon er fi kip di Sabat. <sup>17</sup> Dehn ting deh da noh notn bot wahn shado a di ting dehn weh fi kohn, bot di reel ting da Kraiss. <sup>18</sup> Wen peepl kohn tu yu di seh dat dehn beta dan yoo bikaaz dehn ku si vizhan, ahn dehn wershship aynjel, noh mek dehn fool yu. Dehn oanli goh aan laik dehn hombl bot dat da noh soh. Dehndeh peepl ful op a dehn oan selfish, hyooman wayz. <sup>19</sup> Peepl laik dehndeh noh di hoal aan tu Kraiss, weh

---

\* **2:11** serkomsaiz: Di Jooish peepl dehn kot aaf di skin rong di paint a di bwai baybi dehn peenis az wahn sain fi shoa di agreement weh Gaad mek wid dehn chroo Aybraham.

da di hed a di hoal badi. Da Kraiss gi di badi di schrent weh ih need ahn ih yooz di jaint ahn di mosl dehn fi hoal it tuge da az Gaad powa mek ih groa.

*Wi ded ahn liv wid Kraiss*

<sup>20</sup> Wen Kraiss ded, unu ded tu, ahn soh di spirit dehn weh di rool dis werl, dehn noh rool yu nohmoh. Soh den, wai unu di liv laik unu stil bilanz tu dis werl? Wai unu di fala di rool dehn a dis werl? <sup>21</sup> Di rool dehn seh, "Noh ga notn fi du wid dat! Yu noh fi tays dis! Yu noh fi toch dat!" <sup>22</sup> Aal dehn ting deh weh dehn seh noh fi eet er jrink, dehn wahn gaan az soon az peepl eet dehn ahn jrink dehn. Da oanli peepl mek dehn rool deh ahn teech dehn tu ada peepl. <sup>23</sup> Dehndeh roolz deh wuda waahn luk laik dehn mek sens, wid dehn foas wershup a aynjel, di way how dehn priten fi bee hombl, ahn how dehn ponish dehn badi fi kip it anda kanchroal. Bot da noh soh, bikaaz dehndeh tingz kyaahn help wi fi kanchroal di ting dehn weh wi sinful badi di krai owt fi du.

### 3

*Roolz fi liv hoali*

<sup>1</sup> Wen Gaad mi rayz op Kraiss, yu mi rayz op wid hihn tu; soh bikaaz a dat, yu fi set yu haat pahn di ting dehn weh deh eena hevn, wehpaat Kraiss sidong pahn di rait han said\* a Gaad. <sup>2</sup> Yu fi kip yu main set pahn di ting dehn weh deh op eena hevn, noh pahn di ting dehn pahn dis ert; <sup>3</sup> bikaaz yu don ded, ahn yu laif deh haid weh wid Kraiss eena Gaad. <sup>4</sup> Kraiss da wi chroo laif, ahn soh wen hihn kohn bak, yoo tu wahn dehdeh wid ahn, ahn shayr eena fi hihn gloari.

*Di oal laif ahn di nyoo laif*

---

\* **3:1** rait han said: Dat da di plays a aana ahn powa.

<sup>5</sup> Yu fi get rid a dehn sinful tingz weh di chrai kanchroal yu. Kil di feelinz weh ga fi du wid eni kaina sin weh ga fi du wid seks. Yu noh fi liv dehn kaina loos laif weh ful a los ahn eevl weh deh eena yu main. Yu noh fi bee greedi bikaaz dat meen seh dat yu wership tingz moa dahn Gaad.

<sup>6</sup> Kaa peepl weh du aala dehn kaina sinful ting, Gaad wahn beks bad wid dehn. <sup>7</sup> Wan taim, unu unusef yoostu liv laik dat. <sup>8</sup> Bot now unu mos stap du dehn tingz deh. Unu mos stap geh beks eezi. Unu mos stap hayt peepl an stap du eevl. Unu mos stap insult ahn slanda peepl ahn stap kos bad wod. <sup>9</sup> Yu mos stap lai tu wan anada bikaaz yu don giv op da way a laif deh wid dehndeh bad habit. <sup>10</sup> Insteda dat, yu fi put aan di nyoo self. Dis da di nyoo self weh di laan moa ahn moa bowt Gaad weh mek yu, ahn soh mek yu kohn fi bee moa ahn moa laik hihn. <sup>11</sup> Ih noh mata if yu da Joo er noh wahn Joo, er if yu serkomsaiz er yu noh serkomsaiz. Ih noh mata if yu da wahn farina<sup>†</sup> er yu noh sivilaiz,<sup>‡</sup> wahn slayv er wahn persn weh free. Aal weh mata da Kraiss ahn dat ih liv eena aala wi.

<sup>12</sup> Gaad pik unu fi bee fi hihn oan speshal peepl dehn weh hoali, ahn weh hihn lov, soh mek unu haat goh owt tu wan anada; unu fi kain ahn hombl, unu fi chreet wan anada gud, ahn ga payshens wid wan anada. <sup>13</sup> Aalwayz bayr wid wan anada, ahn if enibadi du unu eniting, fagiv dehn; jos laik how di Laad mi fagiv unu, rait soh unu mos fagiv wan anada. <sup>14</sup> Bot moa dahn eniting els, unu fi ga lov kaa dat da weh tai aala dehn ting tugeda soh dat evriting ku goh smood smood.

<sup>15</sup> Eech wan a unu da paat a wan badi, soh unu fi liv

---

<sup>†</sup> **3:11** if yu da wahn farina. Di Greek peepl dehn doz konk farinaz weh kudn taak Greek az peepl dehn weh noh sivilaiz. Dehn mi luk dong pahn dehn az di loawa klaas a sosaiyati. <sup>‡</sup> **3:11** Er: Sitiyan: Dehn da wahn chraib a savij peepl weh oanli wail ahn kruwil.



eena pees wid wan anada. Soh den, mek da sayhn pees weh Jeezas Kraiss gi unu kanchroal how unu tink. Ahn unu fi aalwayz tank Gaad. <sup>16</sup> Mek di mesij bowt Jeezas Kraiss aalwayz liv rich-wan eena unu haat; teech wan anada, advaiz wan anada, ahn du it eena wahn waiz way. Sing saamz, ahn sing di him dehn, ahn sing prayz sang tu Gaad, ahn aalwayz tel ahn tanks eena unu haat. <sup>17</sup> Ahn evriting weh unu du er seh, unu fi du it eena di naym a di Laad Jeezas, ahn unu mos gi tanks tu Gaad di Faada chroo Jeezas.

*Sohn roolz fi mek wi fala*

<sup>18</sup> Unu uman weh marid, unu mos put unu hozban fos. Dis da unu jooti bikaaz dehn da wan wid di Laad.

<sup>19</sup> Unu hozban, unu fi lov unu waif ahn noh abyooz dehn.

<sup>20</sup> Unu pikni, unu fi obay unu ma ahn pa aal di taim bikaaz dis da weh mek di Laad pleez wid yu.

<sup>21</sup> Unu weh da pa, unu noh fi du unu pikni notn fi mek dehn geh beks wid unu; dat wahn oanli diskorij dehn.

<sup>22</sup> Unu weh da slayv, unu fi obay unu maasta dehn weh deh pahn dis ert, noh oanli wen dehn di wach unu bikaaz unu waahn dehn feel gud bowt yu, bot du it wid yu hoal haat fi aana di Laad. <sup>23</sup> Eniting weh yu du, yu fi werk haad ahn du it wid wahn wilin haat laik yu di du it fi di Laad ahn noh fi peepl. <sup>24</sup> Memba seh dat da di Laad Kraiss yu reeli di serv ahn da hihn wahn riwaad yu. <sup>25</sup> Bot if yu du weh rang, yu wahn geh pay fi di rang weh yu du. Gaad noh ga no fayvrit.

## 4

<sup>1</sup> Unu maasta, yu fi du weh rait ahn gud fi yu slayv dehn, bikaaz yu hafu memba dat yoo rispansabl tu wahn Maasta eena hevn tu.

*Paal tel wi moa ting fi du*

<sup>2</sup> Unu fi kip aan di pray aal di taim. Wen yu pray, noatis gud weh yu di seh tu Gaad, ahn tel ahn tanks. <sup>3</sup> Ahn wen unu di pray, pray fi wee tu, soh dat Gaad wahn gi wi di chaans fi tel peepl di mesij bowt Kraiss weh di peepl dehn neva yehr yet. Ah deh eena prizn now eena chaynz bikaaz Ah tel peepl dis mesij. <sup>4</sup> Pray fi mi, soh dat Ah ku tel dis mesij jos laik Ah shuda du it, ahn mek it playn soh dat peepl wahn andastan.

<sup>5</sup> Wen unu deh wid peepl weh noh chros eena Kraiss, du evriting wid wizdom. Tek advantij a evri chaans weh unu geh, fi tel dehn di Gud Nyooz. <sup>6</sup> Wen unu di taak wid dehn, taak tu dehn eena wahn nais ahn inchrestin way weh wahn mek dehn waahn yehr moa. Ahn yu wahn kohn fi noa how fi gi di rait ansa tu evribadi.

*Di brejrin seh heloa*

<sup>7</sup> Tichikos, wi dyaa brada, weh da wahn faytful servant, wahn tel aala unu weh di hapm tu mi. Hihn da wahn dyaa brada weh wi chros, ahn ih di serv di Laad lang wid wi. <sup>8</sup> Dat da wai Ah di sen ahn tu unu, soh dat ih ku chyaa unu op ahn bring unu op tu dayt bowt weh di hapm tu wi. <sup>9</sup> Ah di sen Onesimos lang wid Tichikos. Hihn da mi gud fren weh oanli faytful tu mi. Hihn bilanz tu fi unu groop. Bitween di too a dehn, dehn wahn tel yu evriting weh di hapm ya.

<sup>10</sup> Aristaakos deh eena jayl ya wid mi tu. Hihn sen heloa fi unu, ahn Maak tu, weh da Baanabas kozn. Ah mi don tel unu aredi fi welkom Maak if hihn kohn vizit unu tu.

<sup>11</sup> Jeezas, weh dehn kaal Jostos, sen heloa tu. Dehnya chree da di oanli bileeva dehn weh da Joo weh di werk fi Gaad kingdom lang wid mi. Dehn da wahn big help tu mi.

<sup>12</sup> Ipafras, weh bilanz tu unu groop tu ahn weh di serv Kraiss Jeezas, di sen seh heloa. Aal di taim ih di pray fi unu

wid aala ih haat. Ih di pray dat unu wahn neva stap di chros eena Gaad, ahn dat unu wahn stan schrang far ahn eena evriting, ahn dat unu wahn noa aal weh ih waahn unu du ahn unu wahn du it. <sup>13</sup> Mee, Paal, ku put mi hed pahn di blak far ahn dat ih werk haad fi unu ahn fi di peepl eena Layodiseeya ahn Yerapolis.

<sup>14</sup> Wi dyaa fren Look, di dakta, sen heloa, ahn Deemas tu.

<sup>15</sup> Seh heloa fi mi tu di bileeva dehn da Layodiseeya, ahn espeshali tu Nimfa ahn aal dehn wan weh meet eena fi shee hows.

<sup>16</sup> Afta yu don reed dis leta, yu fi mek shoar dat di cherch eena Layodiseeya reed it tu. Ahn yu fi reed di leta weh Ah don rait ahn sen tu dehn.

<sup>17</sup> Tel Arkipos seh, “Yu fi mek shoar dat yu du aal di werk weh di Laad gi yu fi du.”

<sup>18</sup> Wid mi oan han, Ah di rait dis paat: *Da mee, Paal, di tel unu heloa.* Unu noh faget dat Ah deh ya eena prizn eena chaynz.

Ah di pray seh dat di grays a Gaad wahn deh wid aala unu.

## **Di Nyoo Testament eena Bileez Kriol New Testament in Belize Kriol English (BH:bjz:Belize Kriol English)**

copyright © 2012 Wycliffe Bible Translators, Inc.

Language: Belize Kriol English

Translation by: Wycliffe Bible Translators, Inc.

### **Copyright Information**

© 2012, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

### **The New Testament**

in Belize Kriol English

**© 2012, Wycliffe Bible Translators, Inc. All rights reserved.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-08-06

---

